



焦太史編輯國朝獻徵錄卷之三十九目錄

兵部二

尚書

何鑑

彭澤

胡世寧

李承勛

李鉞

伍文定

王憲

王廷相

張瓚

毛伯溫

劉天和

戴金

趙廷瑞

陳經

翁萬達

王邦瑞

史道

路迎

聶豹

許論

霍冀

趙炳然

王崇古

譚綸

王世揚

目錄

焦太史編輯國朝獻徵錄卷之三十九

兵部二

尚書

兵部尚書太子太保何公鑑墓志銘

汪俊

正德十六年辛巳八月光祿大夫柱國太子太保兵部尚書五山何公卒於家公諱鑑字世光少爲諸生輒負大志日出而不忠於君入而不孝於親豈不慚負天地羞七尺之軀哉領成化戊子鄉薦登己丑張昇榜進士宰宜興縣稱大治甲午徵拜山西道御史

彈劾不避權貴素無度牒逐散僧徒總督太監之糜  
卒有需索者廉置於法因被構下錦衣衛獄卒亦無  
害辛丑擢知河南府杜開鑛之患極凶旱之災埋葬  
餓骨收養遺孤修救荒禦災十事悉見施行河南之  
民立祠肖像使子孫世世無忘何公也丁未春陞山  
東叅政歷四川左右布政司使凡利所當興弊所當  
革者悉奏行之天官王公恕考績書最陞都察院右  
副都御史歷刑部侍郎南京兵部尚書叅贊機務時  
劉瑾擅權內外依附公獨毅然不撓瑾黨張文冕者  
公先巡撫蘇松時以詐僞事捕獄亡匿附瑾朝多煽  
禍無所不至以故罰米輸邊幾瀕危殆而公靜以守  
之迄瑾誅辛未春召入爲刑部尚書值人心憤亂盜  
賊蠡起劉六劉七齊彥明藍廷瑞等焚劫府庫戕殺  
守吏內外洶洶南北不通廷議非公不能戡定乃轉  
本兵提督軍務公卽練甲兵嚴號令明賞罰募義勇  
劾將臣之不職者奏請兵部侍郎陸完爲總督授以  
成算屢奏捷音十二月賊覘知郊祭意圖犯蹕公卽  
分調人馬以防衝突奉駕出城民安如堵由是諸將  
奮勇追襲殪賊於通州之狼山殆盡 朝廷論功行  
賞加公太子太保階光祿大夫勲柱國推恩二代封

贈如其官蔭男一人爲錦衣衛百戶當時承平日久外訖內構勢甚倉皇使非公不震不讐大展才猷幾唐之黃巢矣此朝廷不吝爵賞以酬功也公天性孝友事父撲菴公與太淑人雖貴侍立終日承候顏色無少怠兩居憂制痛恨不及時奉湯藥哀毀骨立出廬墓左凡墓上竹木皆手自栽植大祥後感寒疾親族勸之始家居嘗詠詩曰思親未遂曾參養報國徒懷祖逖心益其幼之所志壯之所行念念以忠孝爲本其所以樹立勲業無愧古之大臣也厥有由然哉公主正統七年壬戌得年九十

大司馬彭公別傳

劉耕

彭澤字濟物號幸菴蘭州衛人成化癸卯舉人弘治庚戌進士歷官刑部主事員外郎真定府知府浙江副使河南按察使都察院僉都御史右副都御史右左都御史巡撫遼東直隸真定等府提督河南等處軍務總制湖廣四川陝西等處軍務兼太子太保掌本院事後爲民尋徵爲兵部尚書加少保兼太子太保致仕卒蘭州故多鄉賢修明正學容思段先生者澤外祖父也故自少有聞長益好學平生書不釋手真定時鄉有奄宦竊政或當附之澤卽具一棺於堂

後曰吾身豈附人者哉已準擬附諸棺矣卒無患有  
將才所至征討有功蘭州劉耕曰幸菴公清惠正直  
人也居官常祿之外一毫無取是之謂清受 命於  
朝不問家事是之謂忠平生口不道市井之事手不  
拈權度之物講談道義斃而後已是之謂正凡人  
有善聞斯稱揚友朋有愆遇斯面折立朝有謇諤之風  
居鄉無婉曲之言是之謂直其行實具家乘其勲業  
在四方今弗得而錄姑記其所聞如此云

霸州民劉六劉七起羣盜前後官捕之不勝稍稍行  
劫掠聚衆至數萬人詔左都御史馬中錫討之中錫  
儒緩好名下教招撫六七果至陽若爲就教者

撤而六七遂與其黨楊虎齊彥名益縱賊馳突中錫  
乃大悔 詔逮下獄吏死而陸完進右都御史假節  
用軍興法得誅二千石以下完乘傳驅至臨清遣副  
總兵馮禎許泰遊擊將軍郤永襲楊虎於宋門店龍  
化集大破之尋又鏖格裴子巖斬首二千俘百五十  
諸路剪其蔓又不下千計楊虎死賊分爲兩由蒙城  
太行流劫入河南境者尤狠暴帥曰劉三趙風子有  
十三萬五千騎而都御史彭澤咸寧侯仇鉞帥秦兵  
擣之澤爲人長大腰帶十二圍其顧盼燁如也平居

鮮笑容雖與爲偶語叱叱聲若詈由按察使召拜副都分捕河南賊澤至則大陳軍容擐甲引見諸大校責以退縮顧軍正論行法建轟諸大將無不惕息皇恐頓首請自效良久乃釋遂鼓行前薄賊凡數十戰皆大破殺虜以萬計趙懿跳劉三死於陣於是給事御史上言河南賊平陸完卷寇自重下 詔切責完懼日夜督諸將徼賊而賊隨劬隨脇聚燒運艘掠臨清邳徐而下犯淮安又奔登州海套與完遇蒿淺坡時宣大鐵騎及中土材官良家子悉集合圍賊大敗之六七彥名獨挾驍勇三百騎突圍出星馳掠河西務將北就韃靼尼關險不得道度河南躡荆楚奪瓜州掠泊通之狼山寨完窮追截水陸道六七先赴水死臬彥名斬首將六百俘三百溺死者千餘還朝完澤俱加太子少保右都御史予世襲錦衣千戶時蜀盜藍廷瑞鄂本恕爲尚書洪鍾擊撫平餘黨廖麻子復起勢愈熾鍾耄不復能將 詔澤充總督討之澤悉兵破賊殺麻子衆逃竄山寨多伏弩菁棘中澤分兵出入奪水道度窘開一面縱兵誅之且盡或云廖有異術能隱形旣事急獨身跳澤還加太子太保虜萬騎入宣府大殺掠吏民將轉寇近地詔澤出

提督三關二路久之虜退仍理都察院澤好因酒使  
氣時時出兵書王瓊上嬖人錢寧挾威公卿咸俛首  
拆節澤切齒不能平瓊因寧遣所親近語事邀澤飲  
澤醉嫚罵朱寧奴才壞天下瓊謂澤曰勿妄言澤益  
奮不復可止寧大怒會哈密城及金印爲土魯番所  
取 詔諭還不可且謀得將寇甘肅狀廷推澤經理  
之澤調寧夏兵自便使詣土魯番予繒幣二千銀楮  
一盂一求和還哈密城及印土魯番陽許澤輒奏事  
平乞骸骨澤歸而土魯番變矣薄肅州芮寧全軍沒  
瓊條澤死罪錢寧欲從中下閣臣力救乃免嘉靖初  
徵拜兵部尚書以老加少保致仕卒

兵部尚書胡端敏公世寧傳

趙時春

贈少保兵部尚書諡端敏胡公名世寧字永清祖嵩  
父瑤世爲杭之仁和家人家貧能以勤約自將事瑤及  
母馮無乏子役登弘治癸丑進士第建坊資鎮守太  
監欲市恩公恥干謁竟不取甲寅授德安府推官立  
屬役平徭賦法岐王近倖臣欲困知府需索旁出公  
爲幹辦迄不病擊治孝感豪戴獄力能訟公公竟  
抵獄法刑獄以清陞南京刑部主事應 詔上備邊  
十策極言俗靡十惰宜經武備弘治求言急公復陳  
十事曰今以因循爲慎重緘默爲老成民力日匱而

在位僭奢崇流俗而憎忠直宜汰冗費重守令引用  
英豪輔養 太子奏入皆不報遷員外郎劉瑾已用  
事機戶侵官物累萬公擬盡本法而御史有合瑾以  
庇姦者劾公失入人罪 廷中議皆直公御史以黨  
姦誦內侍劉瑯爲守備都官咸修謁獨公與張嶺余  
祐查約魏校弗肯往已爲郎中則與僚貳約相規而  
勿效世俗頡頏猜嫌態擢知廣西太平府召見土日  
勞問其利病卽予舉廢保送蔭子亟趣部夷賄毋入  
府咸感激効用遂討况对虜其酋黃文昌命龍英長  
舍趙元瑤帥其師取太平州印擒李璿來獻治違命  
也公度城將克輟已爲郎中金紗衣犒元瑤贖全城  
生命大城壺關條治蠻事上之督軍多奏行者政爲  
南徼最行毋馮三年喪畢來 朝道逢流賊夜走滄  
州與共守卒完城再知寶慶府約岷府毋受訟請王  
禁太監橫斂王及中官王潤及諸宗裔反賢公交從  
之治如太平時江西盜張甚遷按察副使備東鄉兵  
降賊等畏誅復叛害兵備李情生要叅政吳廷舉爲  
質公建謀待降者以信服貳者以威已招者必不殺  
再叛者必不招且別宜撫宜誅者主名騰檄開諭賊  
果奉吳叅政以歸公兵亦破滅害兵備者贛賊寇廣

昌屠遊徼官逼建昌馳兵衛益王大破賊衆城二昌而還念江西方殘破而寧王謀亂日甚因劾贛上疏曰江西可慮不獨盜賊鎮賊火燒萬家便地悉歸王府而王債徧閭閻三司受約束而四隅漸騷擾民不得安盜何由息欲望擇鯁骨臣撫循地方勅王止治其國勿撓有司以靖亂原章下兵部尚書彭澤卽請摘公奏以戒王王廼抗章言其支庶選婚擾人卽重禁止而胡世寧離間妖言乞誅之以快忿事下都察院時都御史李士實方爲王造謀行金間用事大臣以故其奏得行命巡按御史逮公會公遷福建

按察使解兵備去寧王遂以是譖公爲逃罪卒得官校來捕而公已間行歸明久繫錦衣獄考治人憐其忠而衣道官始交章論救不能奪公竟發戍遼東歲己卯秋李士實卒自爲太師挾王以叛斬都御史孫燧按察副使許逵死之而三司官果盡降宸濠旣破南康九江府進圍安慶守將張文錦崔文力戰敗其先鋒生得督將王綸綸卽江西僉事譖公於宸濠者也督南贛軍都御史王守仁帥師討賊宸濠還兵大戰樵舍江中擒斬數萬俘宸濠及其妻子朝廷方窮治助宸濠反者凡夷戮死徙者數十族獄至嘉

靖初始竟王守仁者餘姚大儒始爲刑部郎劾劉瑾其言切至瑾畏惡之甚矯武皇帝旨廷杖四十貶龍場驛丞卽日督發意其必死無何聞守仁得活更令衛校追擒校有哀守仁忠者先馳至無錫告之使善自爲計守仁脫衣于江干更着道服遁去羣校以守仁投江白瑾乃已守仁行乞靈隱寺主僧識之逐使去而集徒告縣令曰伍子胥告我有忠臣入我水府吾與之燕七日而出諸某江蘆灘髡徒不救者吾且命毒龍覆若寺縣使僧作無遮水會至其期處於泗中守仁持文憑赴滇南瑾伏誅起守仁爲吏部郎遷鴻臚卿道益高名益重大臣薦討江西賊守仁外迫羣盜內畏宸濠慮其交至而宸濠方散財招士守仁迺使其徒冀元亨爲內間詭說宸濠以萬全使緩發守仁得治兵盡平江西羣盜而宸濠終爲守仁所擒有司坐冀元亨黨反者罪至死守仁力爭弗能得諸權貴素交宸濠者以守仁焚其文書姦狀幸未露反宣言守仁善兵策得志非宸濠比也諸與守仁起義者率利其功或罷斥之守仁纔得稱疾去而嬖倖論功封伯者數人媒孽守仁未已武皇帝大怒曰若欲害平賊功臣得無助賊反乎始窮治反黨趣封

守仁新建伯守仁不敢受而言者交章訟公寃及告  
反者功皆不省間一歲庚辰廼復用公為湖廣按察  
使尋為僉都御史巡撫四川辛巳公入川聞 今上  
即位縉紳延頸以望治平公即薦名儒魏校何瑋邵  
銳充講官大臣林俊楊一清劉忠林廷玉為輔弼而  
以後比宋璟一清比姚崇知府劉蔭徐鈺不任為郡  
而蔭為給事鈺為御史時孤忠敢言宜采其謀議  
又薦布政方良永副使胡文璧叅將桂勇等入川以  
自助松潘舊治皆熟番其後官軍不能制賂遺番以  
假道番殺漢人即匿不舉軍或殺番反坐抵命公請

選將更戍以振威移遠餉就近糧以足食立賞罰  
嚴隱匿之禁修烽堠謹巡望以通道路頗施行矣而  
總兵張傑內臣張欽皆因公劾其貪虐罷免蓋嘉靖  
新政鑒正德宦官濁亂之弊不復遣鎮守天下翕然  
稱更生云 召為吏部右侍郎至汴丁父憂去甲申  
免喪被召即為疏論追崇孝親之禮宜盡宦官外戚  
之寵當削畏眾口不敢上然 廷中已聞其說事具

欽定明倫大典中魏校予公書言違眾論以建事  
恐成衰宋之弊屬以兵部左侍郎 召公而小人希  
寵請遷陵寢屬神路於 太廟其說紛紛公具陳其

不可復以戍邊時所見邊塞利害二十五事爲疏以獻又奏請大臣輔養聖躬且講注大學秦誓章以戒媚嫉洪範唯辟威福玉食章以戒柄下移孔子繫易節初九爻義以慎幾事俱留中省覽賞贊成大禮功陞俸一級給事中余經管律劾公奏累留中且將開告密之端公乞罷不報丙戌公知武舉薦李承勛何孟春自代詹事霍韜上官人資格公申言用人二十事屢引疾乞改南秋楊一清爲請乃調南吏部左侍郎時方考察京官故用公丁亥夏五月陞南京工部

九月陞俸秋七月

召爲左都御史尋改刑

部尚書用霍韜言仍爲左都御史加太子少保入見辭免少保請虛心待物毋以喜怒爲用舍皆嘉納公素剛嚴及總憲務持大體期清刑獄憲綱十條上之申理執法被誣者復遷刑部尚書戊子春公懇辭求去具陳昔爲宸濠陷害長子憂死次子純幼門戶無所託上重哀大臣特命送純入監錄用織造太監剛聰誣陷運兵二千人盜御服公劾其妄請從寬法後剛舍人訐其詐聰坐抵罪而公益信嘉靖初大臣類能裁抑嬖倖如此天下益仰賴上德剛明云言官因災變陳言官校逮囚之害公力贊施行郎

官或拘泥律例有溺於詩文者每諭以經濟爲務然時方尚虛談奕棋費日亦不守律例爲詩文也土魯番自弘治以來挾哈密城印以要中國而哈密回夷居甘肅城者相影響至正德間遂招土魯番兵侵肅州約翻城兵備副使陳九疇知其謀以糧乏卻援兵悉索城中回夷得衷甲者盡敲殺磔以示番募屬夷劫番營而結瓦剌使據哈密九疇自搏戰敗其兵會總制彭澤經略哈密奉勅諭速壇滿速兒火者他只丁還哈密城印九疇留勅不與土魯番計窮陰遣間使寫亦虎仙以秘術干進得與養子列知兵部

尚書王瓊與彭澤交惡卽誣奏澤九疇罪瓊覆奏九疇死辜削澤仕籍衆皆不平故更化之初言官首劾瓊戍榆林澤以太子太保爲兵部尚書九疇以按察使起爲僉都御史巡撫甘肅連破番兵斬火者他只丁絕其貢賜番回唯噉賈利旣失奇貨大困愍後瓊復召爲總制陝西軍與用事謀報怨使王邦奇等訟之時澤已爲民執九疇於刑部獄欲併罪澤連及楊廷和詔在廷議公獨上疏具論回夷姦狀訟九疇功上大悟曰今得胡世寧說豈有殺我巡撫償回子命耶九疇免死戍遼東獄得解隴西豪柳瓊

誣巡鹽御史王朝用陰私得旨逮治公以爲傷憲體奏直其事江西言甘露河南言河清遣官禮謝天地羣臣致齋風霾大作公自請黜以答天譴不許劾去郎官錄囚不當者三人建革律例親屬犯姦者得減死庶人在官應守法而不守者科枉法贓論冬十一月轉兵部尚書加太子太保再辭不許乃先陳兵政曰定武略崇憲職重將權增武備更賞罰御土夷足邊儲絕弊源正謬誤惜人才得請乃受官大臣陰進銷兵計公亟言太平不可忘戰士魯番切曲先衛人牙木蘭擁族帳內徙土魯番遣使來求而大臣卽欲予之以易哈密公議以曲先衛本中國羈縻牙木蘭反正歸順非納叛比而哈密空城懸遠無益事實土魯番欲甘心牙木蘭以携貳我屬夷而以哈密爲餌釣大利故臣以陳九疇爲是宜勅瓊爲國忠謀先盡復爪沙羽翼之地悉收亡失屬夷封殖哈密永爲不侵不叛之臣而後請勅降印庶不辱王命且土魯番方恫喝中國懸衡諸夷但遠越流沙烏合難久我大震威略以離其從購賞義附使相破滅此伐交之術正宜厚牙木蘭以風蠻夷並薦馬昊施儒楊必進及九疇爲將不見用公遂以己丑春力求致

仕命馳驛歸賜月俸三石歲給役四人庚寅夏復  
用爲南京兵部尚書叅贊機務不能起但請廣圖繼  
嗣容直言惜人才而已竟以是歲秋九月晦卒年六  
十幾加贈祭葬子純以公恩今爲督府經歷貢日回  
夷卽古西城漢唐時城郭連屬亡能爲害元以強兵  
耗散其從而近世復亡赤蒙古罕東安定諸種哈密  
爪沙之間千里空虛其爲河西患至微患在雜胡西  
番耳陳九疇策之忠矣其人善賈多術巧往往以珍  
奇貨射時貴爲虎聲脇中國至傾民力爲輦挽貨販  
詩曰大風有隧貪人敗類匪用其良覆俾我悖嗚呼  
悲夫端敏公之論卓然哉故掇其大要列于傳

胡端敏傳

雷禮

少保胡公諱世寧字永清別號靜菴杭仁和人也家  
落莫棄貲產不營慨然思經濟天下弱冠補昌化學  
生受知吳提學伯通有靈芝孤鳳之褒弘治五年舉  
鄉試第二故事計偕者給路費百金公以浙青竟辭  
其半明年第進士歸例得枋其門恥關謁鎮守中貴  
人棄之去初除德安推官時岐府開國百需蝟集羣  
從怙勢橫甚悉以法裁之且語王曰此朝廷法卽  
殿下家法某何敢不守此朝廷民卽殿下千百年

立國根本某何敢不恤王由是戢下無敢作奸者及  
請民間開墾湖田充柴炭撫巡業與之公指畫利害  
娓娓乃止在郡屢平抑獄民以不寃其除苛賦清里  
甲諸條畫具可爲經久之法陞南京刑部主事歷員  
外郎郎中帝城多能訛是非成敗人公倜倜然不輒  
撓西寧侯家訟久滯更九司十三道不決公一鞠卽  
得其情案遂判顧金箔者富翁也被羅織致大辟賴  
公雪白每過門必稽顙而去機戶顧謙乾沒官銀累  
萬祈解罪于公不能干逆瑾愬下南道阿奉者疏出  
之劾公爲枉贖後上直公擬抵出者罪兩應詔求言  
疏邊務十事并條勤學問慎輔導廣延納重守令公  
用人汰冗費俱探核本原鑿如也然其強果亢厲人  
固以是賢之而亦多詆忌積三考出知廣西太平郡  
陋甚所隸率土官習不庭叅至則推心羣夷絕餽獻  
或他出過其營單騎入坐帳中縱閱騎射乃還子弟  
應保襲者輒爲任之夷獠帖然孚格于是思明黃文  
昌羅陽黃景明李萬榮全茗許榮高輩皆素桀鶩一  
呼卽匍匐下惟太平知州李璿負固跳踉不已乃  
密檄龍英州趙元瑤扼而執之積禍頓息又建置壺  
關限隔北寇屹然爲一方巨防至今賴之未幾以母

喪解官民惘惘然不忍失正德七年服闋補寶慶初  
往武岡朝珉王聞珉府受詞繫人取其財下諭里老  
奉有令旨必弁其人送府驗實啓行僞者弗貸以故  
府人相戒毋犯後王索民校急公曰先王初封校尉  
遍僉沙衡永寶四府今收回寶慶一府他日子孫分  
封繁衍其可支乎王曰御史奏得旨矣公曰御史奏  
錯知府當改耳主器其直無恨意巨鎗偕鎮守王潤  
以事至郡搖吻於民難饜公折以法潤斂手其從人  
以左道寓郡輒執之恣射平民者又執之潤銜公最  
深而猶稱公好官去其郡屬糧則繁漫奸不可詰乃  
類田均糧一色徵之民省歲供之半闔境盡驩曰胡  
父活我矣踰年陞江西按察司副使兵備東鄉巖谷  
深阻羣盜鼠穴其間日肆抄掠爲饒信患公遇盤錯  
益喜截決恬亂如樂庚二陳邦四等悉設計擒馘之  
其革心如王賽一者至爲奏原其死旣而遷縣峻城  
經武療饑民妥然安矣公嘗調征桃源擣賊巢調征  
毛坊拔吳廷舉調征建昌衛益府皆冒矢石爲士卒  
先又城廣昌城南豐城新城迄今不被寇其功竟爲  
督府所銜不叙會宸濠有反狀人莫敢言獨瘋憂上  
疏曰江西之禍不止盜賊可慮者寧王自得衛兵威

謀日橫騷擾閭閻鈴束官吏禮樂政令漸不出自朝廷臣請勅王自治其國勿撓有司以防未然君子曰用胡公曲突之謀無患矣而當事者泄泄漫下其章濠恚恨甚賄用事者計欲殺公搆飛言誣爲離間親親逮捕之公已遷福建按察使歸省濠嗾其黨巡浙江御史潘鵬發卒襲公公間行自投禁獄被掠服無狀復行江西會勘欲別附他罪于是給舍御史交訟其寃不已用事者迫人言得減死論謫戍遼東十四年六月濠舉兵反都御史王守仁倡義兵俘濠廷議是役也惟王公達權戡亂亦惟胡公先幾伐謀故鷲形潛匿以致於殲滅若斯之亟也特起戍中爲湖廣按察使尋進左僉都御史巡撫四川今上更化以忠直受知益展盡底蘊無隱首勸上取大學衍義一書朝夕省覽以光聖德及言內擒江彬外擒宸濠均當論功昔附宸濠今附江彬均當論罪武臣如指揮牟斌執法受罪內臣如周儀守正殺身宜一體褒錄以示公平無不讜切當上心者松潘內外熟番舊爲蜀藩衛後漸背叛止存東南二路通救援緣守臣弛備南路亦塞乃疏安撫方略在用人添兵將更賞罰足財用事下兵部議行之芒部隴氏者自其祖父

請分設長官司近者兵備官議不可許又疏隴氏裂地設官雖稱衛彼實爲筠連等縣扼賊喉襟從之便樞曹不用令隴壽襲職竟爲隴政所殺人始服其識嘉靖元年晉吏部右侍郎未任奔父喪三年詔議睿皇帝尊號廷臣諍論多被朴除名屬江淮薦饑公免喪家居其孝親保民一疏乞定追崇大禮肆赦羣臣小過使各陳救荒弭亂之策以成今日急務又言新進議禮一言適合未必事事之皆是老成執禮一言過當未必事事之皆非聖明惟天地日月三無私心照臨於上可也凡數千言不果上旣言者欲遷顯

陵於燕山極論遷葬利害乞嚴絕儉壬君臣協恭任賢保民爲務并前疏並進 上嘉納之四年起兵部左侍郎公前謫遼東熟知京東一帶利病進備邊二十五事復憂時事獻三經講議引大學秦誓好惡之章以戒媚嫉尚書惟辟作福之章以重威柄易大傳不出戶庭之章以慎幾微辭多中羣忌皆留中大禮成與加俸辭以在廷議禮臣時在家欲極言治道於後故僭言大禮於前况屬論定之餘不敢冒領又進知人官人二十事會言者劾公啓告密之漸遂力求退改南京吏部左侍郎六年晉南京工部尚書甫二

月以左都御史徵道改刑部尚書尋用詹事霍韜言  
加太子少保仍左都御史掌院事公人持大體申明  
職掌上疏勸 上務執中之學遇事當喜怒者則又  
臨時省察其中節與否而後發至論聽言用人詞嚴  
義正聞者壯之執政請禁私謁公言臣官以察爲名  
人非接其貌聽其言無以察其心之邪正才之短長  
若屏絕士夫徒按考語則毀譽失真而求激揚之當  
難矣上是其言不禁坐臺閱月執政計改公刑部尚  
書公實安之於中外諸司結要必究情比法於理不  
可執議懇惻弗但已大監剛聰與運舟爭道有奧援  
誣官兵攘其織造貲陷幾二千人抗疏不宜廣追驚  
遠近得從寬決至秋聰事敗伏罪而公言益信陳九  
疇者故以兵備巡撫有事甘肅兩敗土魯番兵於時  
總制西事尚書彭澤秉政則大學士楊廷和也土魯  
番據哈密城劫忠順王印以宴市中國縱反間傾九  
疇當事者有憾於楊彭二公欲乘九疇事連坐之噉  
儉人王邦奇聶能遷陳哈密淪陷番達入寇釁起九  
疇於是下九疇獄擬大辟公昌言於朝曰使世寧司  
刑而殺一忠臣寧先殺世寧執政持不可乃密疏爲  
彭陳申理卜上矍然大悟曰豈我巡撫都御史殺來

償回子命耶九疇得不死戍邊楊彭亦免於逮七年春有司奏黃河清甘露降方告謝齋宿忽風霾異常公求黜應變不聽則上勤學恤民任官十事俱報可八年轉兵部尚書加太子太保公辭言甘肅之危可慮四川蜀之危可慮中原兵將饑穀無備可慮臣才性不堪再任不允則陳列兵政曰定武略崇憲職重將權增武備更賞罰御土夷足邊儲絕弊源正謬誤惜人才凡十條詔許蒞部次第舉之始拜大臣建議銷兵如潞城之賊留不欲討討者必治其罪公援古權今力辯其非議遂寢職左郎中數通邊將寵賂無厭且蔑視三司馬公疏劾去而夙弊大奸整刷十五既芒部沙保一支逐官劫印攻圍畢節議者欲革流官復隴氏之後公言壽政讐殺二十年今隴勝或非壽子而驟復其土官是階禍也莫若降勅諭川貴各土官賜之定命其芒部原設四長官司能守土安民卽不復立府如願立府土流惟彼所欲有一人作亂者三人共滅分其地疏上忤執政意中沮之會土魯番大將牙木蘭率衆來降而土魯番誘瓦剌入寇索其羈使且求開貢公言番夷變詐非由起釁今圖復哈密無益而歲受土魯番之挾我爲奸利則宜

有覺而速改之且陳轉危為安之策甚悉喜功者有  
所軒輊不盡用其策公又疏請增武備足邊儲薦馬  
吳陳九疇施儒楊必進堪統軍旅上為起吳將用之  
他亦付所司議行矣桂冢宰萼詆公侵官格不用公  
遂引疾求去且以任人圖治之要 上極言之然多  
違眾求去益力疏三上乃許致仕優賜與人月廩未  
幾再起南京兵部尚書叅贊機務遂稱疾篤猶力贊  
上圖廣嗣育容受直言愛惜人才云九年以疾卒壽  
六十二贈少保謚端敏公宏才遠慮深識天下之務  
遇事斤斤執典不以禍患怵沮雖獨二集周旋鄉

佐不滿二期而神采英銳必欲贊匡至理不肯苟且  
以齋官寵至於清約自守常如寒士而恤宗人之孤  
獨與人之舊德當酬及鄉先進之裔有流落者雖額  
貲賙之不吝豈沒而可祭於社者非耶平生所著有  
大學衍義補膚見二卷春秋志疑八卷讀易私記四  
卷奏議存稿若干卷滄州退兵事略一卷德安太平  
寶慶雜稿共三卷姚源建昌征案東鄉撫案共一十  
卷詩文二卷自叙年譜若干卷 論曰士以直道事  
人顧不艱哉以胡公之忠鯁稽古展蘊期而勵焉將  
若何而極也然自其為推官挺挺特立而擠之散郎

既以是蹶及爲郎剛果以徇其職而再擠之惡郡則  
又蹶至逆濠魚然於時在位者悚息避禍矣而公獨  
首犯之豈其情於保哲者哉既天悔旣起躓踣九死  
之餘而危言蹇蹇迄不少挫嚮非聖明灼知倚任於  
上而能顯其聲施若此其卓卓難矣傳曰國有道不  
變塞焉強哉矯公真其人哉彼揚已取名瞭然使戶  
曉者蓋胡公之細耶

維風編

胡端敏公世寧正德中公由南刑部陞廣西太平府  
知府尋遷江西憲副時宸濠潛謀不軌吏於江西者

勢怵利啗惟其欲之是聽間有稍知順逆者不過循  
默自保觀望規避以脫虎口爲幸耳孰有奮不顧身  
如胡公者哉疏朝入而禍夕發竟以脫身間走得免  
灰滅及械繫掖庭備嘗百毒朝之用事者悉受濠賂  
幾陷不測矣賴御史徐文華等申救減死謫戍遼東  
躬履行間授徒以自業嗣濠誅起官累仕至兵部尚  
書太子太保余惟己卯之變孫忠烈嬰其難王文成  
襄其勛燁然著矣由公觀之要皆焦頭爛額之儔也  
若公者其爲徙薪曲突之謀者乎公爲主事時嘗自  
贊云信而未孚者多言也正而未諒者多戲也周而

若此者好稱人之善也恕而若刻者多發人之奸也  
過有甚於此者輕淺粗疎也然則無一長可取歟曰  
瞞人之事弗爲害人之心弗存有利於國之事雖死  
不避三者吾將持是以終身焉而前數者氣質之偏  
則亦庶乎其有改也跡公生平不媿其言矣公幼極  
艱苦寄食就學卓有經濟之志仕幾四十年雖祿一  
品被服飲食猶素士

兵部尚書李公承勛傳

李承勛字立卿嘉魚人弘治六年進士父田歷官都  
御史承勛自幼靖敏長與諸兄郎中承恩評事承芳  
貢士承箕承顏相師友修勵行業初知大湖縣力行  
善政爲南京主事刑部歷戶工部郎中出守南昌當  
是時南昌難治劇賊矯藩內外孔棘承勛撫機輒應  
正德六年贛賊犯新淦執叅政趙士賢靖安賊據越  
王嶺瑪瑙崖華林賊破瑞州爲廣訶謀繕壁壘抗溪  
澗屢進戰擒胡雪二纜還府華林賊又叛殺副使周  
憲承勛諭降健賊王奇約內應夜引兵舉火爲號大

破賊斬首三千境內安輯卽上疏請蠲租八年桃源賊起江浙間執兵備吳廷璋總制俞諫請邊兵剿賊承勛曰賊乏食必掠裴源積粟請贛兵自德興南昌兵自岳源分兩翼伏裴源而令邊兵驅賊賊果走裴源遁去太監黎安欲奪其功誣以竄賊詞大理卿燕忠卽評廣信事白陞浙江按察使歷陝西河南左右布政使十五年陞副都御史巡撫遼東遼東故宮饒無虜患自汪直開邊虜輒携貳擾我開原懿路泛河三城殘破承勛至務築定遠慶雲古城鎮夷松山諸堡墩望百八十一所屯田千五百頃又修中固鐵嶺

蒲河撫順諸城皆濬湟樹木爲阻固東圍稍寧進俟一等逾年請告嘉靖初起南臺轉南京刑部侍郎進尚書又召入吏部尚書道改刑部加太子少保上疏論時事改兵部尚書兼都御史代胡世寧提督團營惡郭勛驕縱剪其羽翼勳愬之欲并中世寧因辭營務不允嘉靖八年尚書兵部當是時田州岑猛叛兩廣騷動茫部沙保又叛土魯番奪我哈密搖河西小王子歲入塞承勛與世寧相繼本兵同心經理戎事頗戢又奏裁各省鎮守守備內臣二十七人錦衣官校旗勇內府詭將數千人此皆破 祖宗法依城社

坐耗國儲腴民膏血大蠹衆束手閉目莫敢誰何者  
又言騰驤四衛詭冒依附奸欺不可詰官府一體請  
官軍考選清覈並如旗手等衛制曰可內臣言四衛  
禁軍隸兵部不便往歲彰義門破虜東市剿曹賊皆  
四衛直內故得號召易集下兵部再議承勛言往歲  
之事正以兵權歸閹人致亂彰義門之戰由太監王  
振東市之賊卽太監曹吉祥也 上從承勛議九年  
大風晝晦 上恐懼憂邊詔問之答曰 聖祖有訓  
謹備胡戎去歲冰合北虜盡入河套以故陝西邊患  
延寧固原爲急甘肅軍餉專仰河東宜於蘭州及時  
糴貯以備河西災窘曩時河西患苦土魯番亦十刺  
又深入兩寇夾擾孤危益甚海賊套賊出入殺掠並  
經莊浪被其殘害急宜繕塞設險斷臂截種使賊初  
隔絕兀良合最近京師不善撫卽爲門庭之寇雲南  
安鳳之叛軍民困敝臨安蒙自盜賊復曠日持久恐  
釀成大患交趾世子流寓老撾異日歸命請援或據  
地求封皆未可測惟用人理財早爲警備以保社稷  
幸甚十年議耕耒禮詔問承勛言禮有儀文政有根  
本惟上下儉節墾田興水利足民衣食今日急務議  
郊禘又詔問以傳經術順人心對承勛楚人有名

上稔知之幾欲用爲吏部尚書不果是年春充正使  
冊九嬪晨起趨朝暴疾卒贈少保諡康惠承助學有  
源委才無枝柱提兵南北曉暢軍事通達國體議論  
英發廉潔自守家無餘貲子牧益府長史

兵部尚書李恭簡公鉞傳

李 濂

李公鉞字虔甫別號毅齋河南之祥符人氣宇恢廓  
不凡童稚時與羣兒游於市有行路僧見而奇之曰  
此子他日必大貴是歲始從師西社學提學副使天  
台陳公選閱視社學器之遣補邑弟子員治毛詩有  
名中弘治壬子鄉試丙辰舉進士戊午選授山西道  
監察御史巡視中城權貴家有奸法者公繩之不少  
貸受知于左都御史戴恭簡公珊辛酉 勅理河東  
鹺政時鹺池苦潦歲縮涸者公悉令築防延袤數里  
而國課用饒安邑有疑獄久不決逮繫者若干人公

廉得其情一言立決人以為神鎮守官席寵毒民公  
劾罷之比代去民遮道流涕癸亥考績被勅命馳  
封父母甲子出按福建監臨鄉試得人為多未幾以  
疾在告正德丙寅病痊改浙江道覈刷京畿文卷時  
羣閹竊柄濁亂國紀公會疏劾之乞盡除去辭旨伉  
直尋罹內艱去繼外艱適逆瑾擅權惡公會議已乃  
誣以他事罰米五百石輸邊庚午免喪改山東道亡  
何擢知鞏昌府蒞政寬簡期在不擾而已辛未擢四  
川按察司副使值劇盜方四等嘯眾劫掠全蜀繹騷  
巡撫都御史林公俊屬公督勦所向克捷斬首萬餘

捷聞

璽書獎勵賜以金幣仍加俸一級甲戌擢陝

西按察使持憲嚴明獄無停滯未幾超遷都察院右  
僉都御史巡撫山西兼提督鴈門等關公自陝入晉  
道經河東父老羅拜馬前曰我公來矣先是守臣侵  
漁邊儲軍告匱士卒嗟怨公至則釐革夙弊兵食充  
牘將士樂為之用丙子秋虜寇宣府出白羊口南牧  
公度宣大擁重兵虜必不利即移怒山西岢嵐五臺  
諸郡宜亟為之備虜果犯岢嵐如公算斬首百五十  
級獲馬千餘匹我軍全師而還上嘉其功賜璽書  
金幣再加俸一級時中貴欲攘為己功改捷大同公

不之辯而給事中潘公塤爲之不平乃倡言于朝士  
論益重公是歲山西有內寇武廷章等荼毒地方公  
勦之旬日蕩平 詔加俸如前公疏辭且請老歸里  
溫旨慰留丁丑被召復考績贈父如其官 今上御  
極擢兵部右侍郎尋轉左署掌部事奉 詔裁革武  
臣抑僥倖汰冒濫武選肅清嘉靖壬午春虜寇西陲  
號十萬飛檄告急 廷議咸推公素諳虜情閑於邊  
務遂以兵侍兼僉都御史行邊 陛辭賜麒麟寶鈔  
仍發內帑銀四十萬給軍需公馳至固原虜勢方熾  
進薄城櫓時援兵未集危甚公下令大開諸營門晝  
夜不閉虜疑有備不敢逼公間用火砲擊傷甚衆虜  
引去 詔復以公總制三邊軍務乃申明紀律增築  
墩堡謹烽火嚴斥埃廣儲蓄選壯勇軍聲大振踰時  
虜復深入平涼涇州放兵大掠人懷疑懼公曰此成  
禽耳乃密命游擊將軍時臣周尚文等分伏要害斷  
虜歸路我軍大捷斬首百八十級獲牛羊萬計諸將  
入賀公曰汝知賀寧知憂乎虜性狠鬪旣失利必憤  
憤而復來延綏諸路宜有備虜果寇延綏伏發邀擊  
之斬首百餘級或請以捷聞公曰偶勝耳惡足爲功  
鎮巡奏捷 璽書嘉之有明於用人善於料敵之論

虜敗衄遠遁 詔還朝是歲考績贈祖父如其官甲  
申南畿大侵漕運大臣闕員 廷議咸以爲非公不  
可乃進公右都御史總督漕運兼巡撫鳳陽地方公  
冒暑南下察其吏弊而興革之救荒賑饑不遺餘力  
未幾召還掌院事再引疾求去 上慰留之僅兩月  
拜兵部尚書侍經筵兼提十二團營公感知遇修明  
戎政凡邊報警急必審度事勢指示方略期於萬全  
不求近功不徼小利尤注意邊將務在得人請謁者  
無所容時部事叢委文移旁午皆手自裁削坐是過  
勞疾作乃上疏乞骸骨 上遣中使存問兼賜羊酒  
而疾轉劇復上章求去益切 上賜勅褒獎命馳驛  
以還仍月給公廩歲撥月卒皆異數云比行病篤竟  
不起時丙戌九月也得年六十有二 上輟視朝一  
日追贈太子太保諡恭簡遣官護其喪歸葬子惠丁  
丑進士官行人 武宗南狩以諫死贈監察御史

資政大夫兵部尚書兼都察院右都御史伍公

文定墓志銘

張璧

嘉靖庚寅七月二十日兵部尚書兼都察院右都御史致仕伍公卒於家 上聞訃遣官致祭命有司治

隧壙公諱文定字時泰號松月世家湖廣松滋祖思恭贈同知父琇累官貴州叅議俱贈通議大夫南京都察院右副都御史祖妣王氏累贈淑人前母楊氏贈宜人母李氏累贈淑人初叅議公知山西汾州生公州署時成化庚寅九月十五日也公少賦高資或屬對輒響應祖每異之曰兒吾家他日尚書蓋誕時

有殊兆云稍長文思蔚發乃受學今楊少師邃翁邃翁亟許可年二十占弘治己酉鄉試登己未進士授直隸常州府推官比至鞫囚斷案如老法家然受上官檄若賑饑民覈倉餉置巡堡禦海寇數事至今人能言之正德戊辰陞四川成都府同知時逆瑾擅政以在常嘗承勘徐國奏爭民田事逮就詔獄勒公爲民公歸居李淑人喪閉門讀禮若將終身瑾敗用上輿薦徵補嘉興會江西桃源寇發遠近恇懷巡視浙江都御史陶公檄公守開常諸縣華埠諸寨公帥兵往梟其首惡汪宣等十二人并多俘獲賊鋒大挫浙境晏然乃陶公有譽崇兩浙功著二衢之薦紀功給事黎君上其功 詔賞賚公當路疏薦金衢兵憲時議員冗遂寢甲戌擢守河南河南夙多弊政與更始冬早露禱大雪隨應又計擒劇賊張勇李文簡數百人河洛賴安乙亥以公才當劇改江西吉安吉安地重事繁公至卽裁決動中肯綮俗故多訟公鋤奸植良一時豪猾悉斂手服大茅山洞賊作亂王陽明爲巡撫檄公討平之逆濠之變天下莫不震動公號於衆曰吾儕以死報國正在今日郡人爭欲亡斬亡者一人以徇復集諸路兵誓之曰濠今所苦非爾父

兄卽爾子弟今宜早殲爾讐紆乃宿憤衆咸曰惟命  
遂遮留陽明飛檄諸郡縣乃繕兵編舸轉餉窮日夜  
不休旣又爲文哭孫都御史許副使二公二公首遇  
害者衆感奮力乃發兵時賊已薄江上九江失守安  
慶被圍復遣信牌四出倡明大義收合人心士卒殊  
死戰賊兵氣斂遂漸遁潰公夜引兵入省城坐收巢  
窟仍令所過毋得掠鹵城中人大喜爭伏道迎勞公  
賊犇還又督舟師逆戰王家渡大破之逆濠就縛斬  
馘無算當是時變起倉卒人懷顧望而公獨首奮義  
倡卒成鉅功其摧陷廓清之力斯亦神矣大亂甫平

擢江西按察使而外內重臣忽駐省城京邊士馬紛  
然叢還公上承下應不遑寢食又以剛介致忤權貴  
艱危萬狀不少屈撓尋轉廣東右布政使以平濠功  
陞南京都察院右副都御史提督巡江兼管操江公  
至日紀律嚴明士民悚服又躬戎服督將領平海寇  
有白金文綺之賜嘉靖乙酉上章乞去得 旨遂行  
然薦剡數騰明年復起公爲兵部侍郎右都御史未  
幾雲南羣醜跳梁公奉 勅往督雲貴楚蜀四省軍  
務未至先平公且籌畫撫存罔遺餘力又芒部弗靖  
留彼徂征方調度孔棘忽受命罷兵歸無何 上復

起公提督團營軍務乃再疏請歸歸且年餘忽病弗起於乎悲哉公家居孝友施及宗姻外處僚家恒過於厚好面折人過至有難則力爲排解雖性開朗然負奇氣不與世隨當官有犯諱忌者或勸少輟公厲聲曰吾以身許國違恤其他竟執弗變

兵部尚書王公憲傳

王憲字維綱東平人第弘治庚戌進士授阜平知縣改滑縣入爲監察御史巡按蘇松諸郡時有豪貴怙勢暴橫鄉里家置水牢有負其債者禁滯於中憲發其罪狀置之於法一方肅然晉大理寺丞尋陞右僉都御史清理甘肅戎政進右副都御史巡撫遼東外艱起復歷撫鄖陽大同虜入應州憲勅所部斬獲甚衆捷聞賜緋魚晉戶部右侍郎巡撫關中已而改佐兵部宸濠謀逆扈駕親征經畫軍需所在節省江彬矯詔繫國學生跪於行宮門外憲入奏事因白貫

諸生 車駕久駐留都輔臣共請回鑾憲之力居多  
明年晉本部尚書嘉靖改元乞休歸里六年 詔以  
本官兼左都御史總制三邊吉囊入寇調集兵馬分  
屯要害授以方略戰於細溝堡五日四捷俘獲甚衆  
璽書褒獎進太子太保明年改南京兵部尚書叅  
贊機務再改左都御史總持內憲居二載乞休辛卯  
遣官卽家起爲兵部尚書會雲中逆卒戕辱主帥招  
誘胡虜據城抗命憲舒徐運奇旋就底定以年滿七  
十乞休賜傳歸里仍給月俸輿夫以示優榮卒年七  
十有二追贈少保賜諡康毅諭祭營葬如法憲天性  
孝友敦尚節儉歷官四十餘載不激不抗有古大臣  
風所著有督府奏議等書于汝孝字紹甫第嘉靖丙  
戌進士以禮部郎中改翰林修撰歷山西提學副使  
陝西叅政河南左右布政使晉右副都御史巡撫順  
天以事謫戍卒汝孝器宇淵渥問學該博督學山西  
獎進士類敦尚風雅一時髦雋多所競勸南北履歷  
所至皆有聲迹爲人所稱

太子太保兵部尚書都察院左都御史贈少保

諡肅敏浚川先生王公廷相墓表

于慎行

于慎行曰往正德末河南王肅敏公爲東省學使先  
君贈宗伯公垂髫居門下受知及晚歲數稱述之也  
日月滋遠未嘗敢忘今年商丘沈先生以書來言浚  
川先生醇儒也沒五十六年矣而墓無碑表獨許文  
簡公志藏焉奈何令世人見之今者其孫嗣美來請  
不佞惻然動心介而見於左右夫楊先正之休以成  
哲裔之志請與吾子共之行也謝不敏三作而拜命

沈先生所著碑銘業詳其世茲表其彰著者焉先生  
諱廷相字子衡浚川別號也其先自潞徙儀封世有  
明德聞於閭里父贈官保公增配一品夫人田氏是  
生先生先生風神秀穎早著文聲弘治乙卯舉河南  
省試壬戌第進士選翰林吉士授兵科給事中正德  
戊辰以他故謫爲州判稍遷知縣復召爲御史出按  
陝西會鎮守太監廖鵬毒螫民吏先生繩之以法廖  
遂大恨已而視學北畿有兩中貴人關請先生焚其  
書不應兩人亦恨未有以發也而廖因上書構之此  
兩人從中主其奏逮下制獄又謫爲縣丞稍遷知縣

同知擢四川僉事再進山東副使皆視學政及嘉靖  
初歷湖廣按察使山東左右布政使旋拜都察院右  
副都御史巡撫四川入爲兵部左右侍郎轉南京兵  
部尚書叅贊機務三年召爲左都御史進兵部尚書  
督十二團營兼掌院事六年考滿加太子少保九年  
加太子太保 世宗出內府玉帶及厩馬賜之曾祖  
考妣以下皆爵一品先生之督營也與翊國公郭勛  
共事及歲辛丑勛罪狀覺 上欲遂法之會其受營  
勅後期因逮下吏而勅連司馬名並罷先生歸三年  
以甲辰九月七日卒於里第距生成化十年十月二

十五日得年七十有一兩臺上書請卹所司畏不敢請藁葬城東白村之兆 穆廟登極始用廷議復先生故官加贈少保賜諡肅敏守臣稱制臨祠將作金錢治其兆域吁可謂哀榮禮備久而彌光者與先生居家孝友處鄉婣睦好脩古禮奉身儉素屏絕華侈兩遭大戚哀毀踰常因著喪禮備纂斟酌古今定爲儀式士大夫多遵用之其立朝當官壹務忠誠不欺奉公履正國有大事以身任之利害毀譽無能動搖再列臺諫所建白糾虔皆關大計出按陝西脩明憲典擊斷無諱三爲學使品隲公嚴教先行履齊魯燕蜀之士彬彬嚮服其撫四川威信覃布吏人畏懷屬夷盜邊發兵討平解散其黨西徼以寧騰驤四衛勇士隸在中消多竄市人名籍幾至三萬先生佐本兵奉命清查留五千餘人盡裁其濫禁旅肅然南京內外守備多遣私人推貨關津及進御用服食大發船舟橫索道路糜耗不貲先生窮其根株悉以銖兩酷推爲裁其多少令與載相準且請令守備內臣惟詰奸遏虐以靖都輦不得受民間訟牒侵法司權 世廟雅意釐革所言輒聽正德以來中官蠹敝一旦剗除先生之力多焉其掌內臺日夜講求憲綱分條類

奏班諸御史奉以從事罔敢踰繩至今其籍在也又嘗疏正會議之體事有可否各出所見卽廷推大吏各舉所知主者毋得專決司馬舉江防大帥嘗以職敗立上書爭之竟格不用督理戎政簡練士馬脩明賞罰將校無敢私役兩察內吏三計郡國所贊襄簡隲天下服其公再疏薦何公塘崔公銑呂公栴李公夢陽薛公蕙諸人皆一時名流士論韙之巳亥 車駕幸承天先生疏留不允以九卿扈蹕道中數召問郡邑供頓狀具以質對多所省減嘗和御製歌詩甚見褒賞及他所班賜尚方珍綺不可勝計 世廟知

人善任先生兼京營內臺且及三考所倚信聽納有加等列中興之烈賴焉先生記問該博學術純正於百家之籍無不沈酣而不涉異教文辭詳贍古雅可爲典刑旣罷官歸閉門謝客著述日富以其餘暇與一二舊知嘯咏山林無染世氛遠近高其風規所著家藏集十六種世多有之夫人劉氏累封一品子孫振振濟美幾數十人詳具碑志

少保兼太子太保兵部尚書張瓚傳 實錄

少保兼太子太保兵部尚書張瓚以嘉靖二十一年  
十月卒賜祭葬如例贈太保謚恭襄瓚直隸滄州人  
弘治乙丑進士授吏科給事中累陞兵部左侍郎兼  
左副都御史總制宣大偏保等處軍務大同軍叛瓚  
有綏定之功陞兵部尚書以 宗廟大工成加太子  
太保陝西奏捷加少保瓚累被言官論列先後無慮  
數十章皆有顯跡然 上終不去之及是卒卹典猶  
加隆云

瓚字廷獻滄人也寓戎藉京師家焉方面大耳眉入

鬢骨隆隆起也而強記練兵事初以尚書郎選擢通  
政叅議累遷通政使久之大同兵亂殺主將詔侍郎  
劉源清都督卻永討之不下所傷殺僅相當 上怒  
逮源清永下獄進瓚兵部侍郎代將至則其麾下殺  
其倡亂者請降乃還遂進尚書累加少保太子太保  
瓚故善翊國公勛勛時被 上知所言亡不酬力而  
力薦推瓚才可大用 上亦奇其貌曰此福將足使  
也張洪者寧夏人 武宗朝得幸爲左都督頗習熟  
邊事後坐法戍遼左脫身還館瓚家諸將挾賄托遷  
者爲瓚衡地饒瘠第賄輕重而以十之一酬洪又許  
爲奏復官不果自總帥叅遊而下俱有餽不卽素驍  
勇有才望連剡薦者弗爲上也天下承平久不甚熟  
兵革而瓚所用俱債帥以故甚壞不可復作云瓚爲  
兵部十年蓄財帛百萬計矣內奸多奇計媚結中貴  
人內外纖悉必知預爲備先後給事御史露章論瓚  
亡慮數十百自若也嘗一日 上賜飛魚服而瓚別  
衣他餽者五綵奇麗甚 上出遙見之意其蟒不懼  
而貴人私走語瓚自白乃解酬中貴人金八千矣它  
多類此瓚少壯且老居官亡喪病假七十餘乃卒後  
虜大入殺掠吏民沒郡邑土上赫怒累致大司馬辟

虞復錄 卷之二十一  
朝論切齒瓚而已死不復可窮詰云

前光祿大夫柱國太子太保兵部尚書東坡

公伯溫行狀

羅洪先

公諱伯溫字汝厲姓毛氏毛之先爲浙三衢人宋初  
口休者來守吉州因家龍城其後遂爲吉水人十八  
世叙倫爲公曾祖以祖超貴贈奉直大夫兵部武選  
員外郎曾祖妣張氏贈宜人超仕至廣西府知府祖  
妣劉氏贈宜人父榮舉鄉試爲浙江布政司經歷以  
公貴封大理寺寺丞而妣楊氏封宜人後公屢推恩  
自曾祖以下累贈光祿大夫柱國太子太保兵部尚  
書曾祖妣以下皆一品夫人公娠時嘗晝見寶塔色

相具備稍長輒有異識爲童子隨寺丞公與宦遊子弟處無驕侈態補諸生提學副使邵文莊公奇其文正德丁卯舉鄉試明年第進士授紹興府推官每斷獄委曲詳慎務中人情不深文以矯名郡人呼爲毛青天當道判訴者咸求詣公爲幸或吏事疑似牽制與輻轉不可致詰者必相屬以是攝判嘗半越中辛未徵拜河南道監察御史巡按福建左布政某用賄入爲大理卿公論劾不貸郡縣征民賦率廣額外羨日舟車耗息幾瑋正算籌校釐正必復故常丙子巡按河南禁諸司人和買諸司有所科遣必親校勘如

均徭大戶背酌丁稅爲準鎮守太監孫某往在山東許御史得直人多畏之至是市猾羅求匿府中爲奸利公發其罪狀窮逮頗急孫怒謂人曰是鉗辱我我將甘心公聞之一日至其府謂曰吾未朝食曷食我食我必宴樂醉飽始得孫不能測強具食食半謂曰外間聞公有言故來相就能待吾食已耶孫驚曰是何言是何言公天子法官也吾何敢公哂曰我固知無是事也聞公在山東許御史費金二萬乃得直御史爲公許遂有名人多憐之公旣失利且誰不切齒者吾知若有懲也相與大笑痛飲而罷戊寅巡按

湖廣壽王軍校凌官吏虐民一繩以法仍請詰治輔導官無所縱洞庭水寇出沒湖中而剽掠多在郡縣巡檄與邏湖官軍互相抵諍寇不可弭公移守備武臣居岳州兼統之患以漸息明年宸濠反斷上游奔逸已而果獲殘黨賜勅加俸湖廣視河南特事孔棘然政體練習激揚有方至今湖南北婦人孺子談稀奇事必曰是出毛御史雖踵譌言不易以他姓也河南湖廣兩遇比士曲防精鑒得人爲多辛巳今上卽位太監張銳張忠十九人奸罪敗露論獄當斬其黨陰庇假汗奏牘冀得易辭公上言忠

銳輩在正德間濁穢朝政誤國不忠使

先帝聖德

不光人人痛憤陛下卽位之詔歷數其惡天下鼓舞如日再中今復緩於行刑坐視詭法豈新政所宜有哉此必司禮太監蕭敬韋霏同惡相濟默與寅緣蓋其利害相關欲俱掩飾臣謂敬霏不誅恐明詔不信於天下也疏入中官爲之屏氣壬午擢大理右寺丞甲申轉左寺丞丁亥擢都察院右僉都御史巡撫寧夏寧夏北隣套虜恃兵爲命首罷衙前標軍三百人歸營諸司無敢以兵自衛檢屯田沒於河者蠲其軍租夏地早寒禾黍未實而霜隕禱於神仲冬始霜

歲大熟未幾大獄事起以公嘗在大理例當坐論未受代宗室以下三千餘人上疏乞留不報戊子罷職歸壬辰九月用薦者復起奉勅提督鴈門等關

巡撫山西未行十月改提督薊州等處邊備巡撫順天未上十一月改理院事明年三月陞右副都御史四月同吏部考察京朝官六月以誥誤復罷歸是年公始五十有二而寺丞公與楊夫人壽康無恙歲時奉觴鄉人咸聚觀榮之甲午十一月丁楊夫人憂乙未寺丞公繼卒丙申皇太子立將詔諭外國上以安南久缺朝貢詔使不通議興師責問而難其人

廷臣舉公可任大事丁酉春以右都御史召公起復公懇辭不允復遣官促上道不得已拜命五月至京師上疏言朝貢不至由莫登庸爭亂所致宜馳檄問罪而赦其脇從交酋且獻誠矣其或不恭必行天討則諸方略不可不圖謹上六事曰正名曰用兵曰用人曰理財曰明賞罰曰一事體以廷議不果行有旨理院事是時雖逾大祥猶託疾乞終制八月服闋始視事十一月陞工部尚書奉命勅提督天壽山工程諸陵石柱道遠車摧勞費千萬公以意制八輪車前後聯絡隨地險夷爲低昂工作易就上聞之喜賜

繡囊銀勺各一戊戌復議安南陞兵部尚書兼右都御史上五事欲均管轄以便行事處錢糧以急濟用備官屬以供委任破常格以作銳氣懸重賞以激人心大約申前說而增其未備徐以議不果協理院事已亥春 聖駕南巡慮宣大諸方切近畿甸 勅公總理整飭宣大山西三關軍務將發賜大紅金綵飛魚羅衣錦袋銀瓢刀箸各一公至邊簡將帥嚴間諜峻關隘增斥候均犒賞而諸邊靖大同之北川原漫衍難以守望往年巡撫張公文錦議建五堡叅將賈鑑不能和拊士卒激禍隕身是後論者競以五堡爲諱公謂昔之憤事由處置失宜勞逸不均非堡之害也於是卽舊弘賜鎮川二堡廣之於鎮川東增堡曰鎮邊弘賜之西增鎮虜鎮河一堡堡相去各二十五里募新軍三千實其中蠲廢田之租使之屯耕以一叅將督五指揮分守之先是虜入大同無虛歲至是五堡橫峙聲援易及警報鮮至五月還院以 皇太子恩贈祖父母父母如其官廕一子國子生其年置官寮加太子賓客仍協理院事秋七月復同吏部考察京朝官八月 上決意南征加公叅贊軍務九月同總兵官咸寧侯仇鸞南行十月兵部論五堡功陞

太子少保賜銀綺復蔭一子國子生庚子夏至廣徧  
求計畫安南者始安南黎利代陳而王四傳至昞爲  
陳嵩等所殺昞無嗣國內爭亂其臣莫登庸父子割  
據其地黎氏舊臣鄭惟瞭等告變且以黎寧爲請登  
庸懼納表乞降朝廷遣官廉之未得至是 勅公得  
以便宜行事且視誠僞爲行罷議者多主黎氏欲乘  
釁取故地郡縣之公旣廣集羣策遣人宣布 朝廷  
威德反覆利害夷民上狀爲莫登庸送款者甚衆公  
懼夷性叵測未可輕信下令籍諸省土漢狼達水兵  
二十餘萬兩廣分三道以入一自憑祥一自龍州一

自思陵而以歸順欽州烏山三哨援之雲南分三道  
自蓮花灘以入利兵儲糧刻期待發九月至南寧擇  
地布管登庸聞益懼屢使請罪且言黎民已絕無可  
推擇 朝廷曲赦其死願歸欽州四峒故地世世奉  
朝貢正朔如制辭極悲懇公念安南罹禍已久 聖  
天子全覆宇內不忍一夫失所平其毒亂豈以貪利  
土地爲心且窮治大密非羈縻遠夷之道遂定計以  
十一月納降鎮南關至期築壇具儀登庸率屬繫頸  
徒跣北面蒲伏獻降表候命遣姪莫文明代詣闕下  
公爲疏請 上從之以登庸爲安南都統使分治其

地處惟賸等內地厚予田宅訪黎氏之裔館之他州  
進公太子太保加賜銀綺 詔班師明年八月促入  
院九月自陳乞休不允壬寅正月至京師辭免進秩  
上慰諭有加公益感激舉時弊當釐革者列爲八  
事一禁酷刑二慎舉劾三革騷擾四懲勢豪五省繁  
文六明職守七正士氣八備兩造意以近世刑獄任  
情民多冤死官司上下相蒙多承風旨伺喜怒剝民  
皮鈞取機利御史既不能辨奸僞日肆貴賤化  
習風靡 斬不可長請一一覺察如制 上報曰  
民不得所皆有司貪酷致御史舉劾失實都察院不

嚴考覈吏部不公黜陟給事中不能糾正國家何  
焉卿言切中時弊其令所司務實舉行是時巡按遼  
東御史胡某縱左右受賄公劾罷之朝廷紀綱爲之  
稍振北虜犯邊兵部有所建白必令公覆議以上虜  
嘗越三關畿輔震恐公以都城無郭恐一旦倉猝無  
備欲倣南都爲輔城以衛軍民疏上不果行十一月  
理兵部事往時諸邊將領轉遷計納賂厚薄爲遲速  
莫不稱貸以行謂之債帥帥不能償輒假科條沒入  
軍士衣糧朘削日甚以是邊兵貧弱不支敗衄公謂  
此弊不除雖有奇策不可取效痛禁抑訶發以杜倖

門已而奉勅提督團營軍務營內丁耗方議招募公上言兵貴精不貴多都城招募良民未必肯行而賈豎游食緣以括利莫若簡閱爲先又言兵不用命以法令太寬上無節制故也夫退無必死之患進有不測之危孰肯冒鋒鏑以致命哉如涉逗遛自都指揮以下斬以徇首將則令巡撫狀罪以聞如是而威不行者無是理也親軍衛士多勲戚中貴子弟怙勢干寵名實莫究冗食濫爵未有齒及者公銳意清汰怨讟日起不爲動公善任人有所咨詢虛已相下卽廝卒皆得盡言以是將領勇怯賢愚無不周知應劇允轉不少執吝諸邊兵力財用不足疏至卽議遣發無遙制之患甲辰六月以一品滿考進光祿大夫柱國給四代誥命上遣奉御賀俊賜楮幣少牢上尊十月巡撫順天都御史朱方以邊境無事乞罷戍兵已而戒嚴方保罪公亦坐是罷爲民歸家二月疽發背卒垂卒郡邑大夫來問疾危坐談國家事不少亂鄉人聞訃無少長咸太息嗟惋公平生豁達友愛和易易與人居言語嫗嫗不爲崖岸急人之難援之不克邑邑如有所失以是宦遊四方無間識不識鮮不願與納交者氣宇沈緩臨大事剖疑折奸聲氣

不露言人之善若出諸已卽揆文削牘有爲增一言  
易一字者終身念之不忘故能所至有聲動無敗事  
建五堡時人爲之危而堅任不惑及征安南倖功者  
謂公必有冀望然卒奉 上德意保全生靈兵不血  
刃師不羸糧默定僭亂懷服南土未嘗張皇變幻詐  
飾觀聽雖由稟受成算亦其謹厚惠慈出於天性然  
也夫人謝氏父曰顯褒母楊氏夫人生而樸靜醇懿  
年十九歸公公祖父已貴而家人猶食貧夫人備嘗  
艱苦拮据以足衣食及被恩封布臬日夕紡績不輟  
與里中媪不異親戚女奴初來求謁傍人竊指語以  
爲夫人不信也封孺人進宜人加淑人後 皇太子  
立箋賀中官獲賜文綺公征安南挈家歸夫人以疾  
道卒玉山子三公生成化壬寅七月六日卒嘉靖乙  
巳六月一日壽六十有四

不露言人之善若出諸已卽揆文削牘有爲增一  
易一字者終身念之不忘故能所至有聲動無敗事  
建五堡時人爲之危而堅任不惑及征安南倖功者  
謂公必有冀望然卒奉 上德意保全生靈兵不血  
刃師不羸糧默定僭亂懷服南土未嘗張皇變幻詐  
飾觀聽雖由稟受成算亦其謹厚惠慈出於天性然  
也夫人謝氏父曰顯褒母楊氏夫人生而樸靜醇懿  
年十九歸公公祖父已貴而家人猶食貧夫人備嘗  
艱苦拮据以足衣食及被愆封布臬日夕紡績不輟  
與里中媼不異親戚女奴初來求謁傍人竊指語以  
爲夫人不信也封孺人進宜人加淑人後 皇太子  
立箋賀中官獲賜文綺公征安南挈家歸夫人以疾  
道卒玉山子三公生成化壬寅七月六日卒嘉靖乙  
巳六月一日壽六十有四

光祿大夫太子太保兵部尚書贈少保劉莊

公天和墓志銘

王世貞

嘉靖乙巳冬十二月二十有三日太子太保兵部尚書劉公卒楚守臣以訃聞天子爲震悼輟視朝太宰議贈贈至少保大宗伯議祭祭至九議諡諡法履正志和因事有功爲莊襄大司空議葬葬所須縣官供給無乏然公有子四其三皆先卒最後燦最賢而又繼卒諸孫幼以故公歿十六年而門人大司馬劉公采始克具狀又十五年而孫守復輩以狀來請志銘嗚呼莊襄公固德靖間勛賢臣也惟不佞嘗竊記

之矣何敢辭誌曰公諱天和字養和其先南昌人諱  
夢者從 高皇帝起義兵有功官同知漳州府賜田  
麻城遂爲麻城人漳州公有四子長曰從政由進士  
拜御史累遷河南叅政叔曰隱居公從憲子曰訓其  
積官皆與從政同而得山西山西公子仲翰爲崇德  
令崇德公子璿魁南宮以豐城令入覲卒吏民思而  
祠祀之自崇德公至豐城公皆以公貴贈尚書左都  
御史豐城公有淑配曰秦夫人寔生公公少穎朗十  
歲能屬文十五從父宦遊豐城鄉先生楊文恪公談  
理學爲世模楷所授公舉子業而內奇公至別而爲  
文以古人期之二十遂舉於鄉公爲人長身玉立顧  
盼偉如也自是三困公車而其遊太學所交多名士  
大夫後成進士授南京禮部主客司主事居二歲餘  
天子誅逆瑾於臺臣多所更置而公以茂異徵拜  
御史出按陝西前是填陝太監廖堂貪橫甚而寘其  
弟鵬於錦衣相表裏爲奸及公當出鵬候邸中甚口  
肩脇爲堂請一日歡公正色不之顧旣抵陝首榜廖  
堂不法事於衢飭諸司毋曲徇而又縛其爪翼數人  
於獄堂陽爲惴惴請一切得自新公亦冀其貌悔小  
寬之而謗書則陰上矣會公監鄉試所得才士人盛

之矣何敢辭誌曰公諱天和字養和其先南昌人諱  
夢者從 高皇帝起義兵有功官同知漳州府賜田  
麻城遂爲麻城人漳州公有四子長曰從政由進士  
拜御史累遷河南叅政叔曰隱居公從憲子曰訓其  
積官皆與從政同而得山西山西公子仲鞅爲崇德  
令崇德公子璿魁南宮以豐城公皆以公貴贈尚書左都  
祠祀之自崇德公至豐城公皆以公貴贈尚書左都  
御史豐城公有淑配曰秦夫人寔生公公少穎朗十  
歲能屬文十五從父宦遊豐城鄉先生楊文恪公談  
理學爲世模楷所授公舉子業而內奇公至別而爲  
文以古人期之二十遂舉於鄉公爲人長身玉立顧  
盼偉如也自是三困公車而其遊太學所交多名士  
大夫後成進士授南京禮部主客司主事居二歲餘  
天子誅逆瑾於臺臣多所更置而公以茂異徵拜  
御史出按陝西前是填陝太監廖堂貪橫甚而寘其  
弟鵬於錦衣相表裏爲奸及公當出鵬候邸中甚口  
肩脇爲堂請一日歡公正色不之顧旣抵陝首榜廖  
堂不法事於衢飭諸司毋曲徇而又縛其爪翼數人  
於獄堂陽爲惴惴請一切得自新公亦冀其貌悔小  
寬之而謗書則陰上矣會公監鄉試所得才士人盛

於他時其程文爲諸省甲甫畢而堂之弟鵬素奴事幸臣寧從中道地堂謗書以其校卒稱詔逮公既就係堂使所親信恫喝校卒且啗之利以求甘心焉長安吏民感公恩而痛其冤慟哭擁車前後數萬人車爲枳不得發壯者至掎梃行求堂欲捶殺之堂恐稍杜門引避而其豪張傑王倫數十人相與嚙臂爲盟護公所過舍傳必週視食必先嘗堂前秘遣尾公者不得近竟以免而公之下獄也幸臣入鵬嗾考撫公罪不得遂長繫於是給事御史俱有言赦出爲金壇丞亡何進爲其令有治理聲擢同知蘇州府事

時大盜湯毛九等起湖州之孝豐山中蘇爲蹂躪臺臣驟用公謀平之而公有湖守之命矣公至湖則首禮一隱碩與謀政所當先復折徵均耗賦其民大悅以擬謝太傅安石顏司徒清臣爲湖守凡五年考績天下第一晉山西按察司副使督學校公以母老乞歸養聞報尋得旨別用久之仍故官督陝學於其職益稱明年遷南太僕少卿尋改太常卽以其年爲都察院右僉都御史督甘肅屯政乃條所以當革者五曰掎尅曰占役曰湖塲曰泃撥曰侵漁所以當興者五曰開墾曰墩堡曰牛種曰治水曰屯兵疏上以次報

可尋用母老請告不許改督諸邊糧餉時少師楊公  
一清在先朝才公於試事已惜公寬爲解於倖寧至  
是益器重公爲特疏薦改撫陝西公前後凡三蒞陝  
其一切利弊哲若鏡燭首疏鎮守中貴人當汰狀罷  
之因裁損守令不經於費者三十餘事民又大悅每  
出則竊相指曰此吾嚮者擁公車耶何吾秦人之多  
幸也公出師平洮岷叛番四十二族獲甲首三百鹵  
倍之已又平胡店大盜殲其魁賜白金二十兩文綺  
二已又平漢中妖賊悉殲之凡再乞休侍養俱不允  
總制王公瓊偕巡按御史上其勞進右副都御史撫

陝如故其明年承秦太夫人訃歸哀毀踰禮以祭葬  
請許之甫公除而總理河道之命下矣時黃河驟南  
徙歷濟而徐皆旁溢不可以漕公晨夜改舟車爲檣  
橈探求盡得其利便濬淤以故導潰以新疏汴河自  
朱仙鎮至沛縣飛雲橋殺其下流又疏山東七十二  
泉自鳧尼諸山達南旺湖濬其上流役夫墜二萬不  
淹時而河工就 天子嘉之進兵部右侍郎兼右僉  
都御史仍其職及冬入理部事未受代遷兵部左侍  
郎兼右副都御史總督陝西三邊軍務公至則申軍  
令豐儲餉廣埤塹選鋒銳飭甲械士氣踴躍思效其

年爲丙申七破虜明年丁酉十一破虜又明年巳亥  
破虜數如丁酉所上級多至二百餘少亦不下四十  
而 天子所推恩公一加右都御史再加左都御史  
其侍郎俱如故進兵部尚書則御史如故其金幣歲  
至三四賜積金幾數百千巳亥公謀虜吉囊將大入  
萃羣帥而誓之大出賜金爲牛酒饗士陳二寶劔堂  
皇指左劔曰將不用命者徇此指右劔曰卒不用命  
者徇此及期而虜衆果大至挾詐乘我帥醉遂埤登  
焉公前已聞警率所部夜行八十里抵花馬池卽故  
壘營之賊錯愕不敢犯引而西公召醉帥二詰得其

狀立斬以徇衆皆股栗遂率以躡賊會天大雷雨賊  
弓膠皆解馬蹶蹶泥淖中斃者相屬而公所檄延綏  
周尚文兵擣其左寧夏任傑兵柱其右固靖魏時兵  
擊其鋒公以大兵尾而勁之強弩火礮四合爭奮賊  
遂大敗走梟其名王以下首虜五百級鹵人畜器械  
稱是捷聞 天子行告 廟飲至禮下書褒予公甚  
篤卽軍中策拜太子太保予錦衣正千戶爲世官賜  
金幣踰等尋以公久勞於外改南京戶部尚書亡何  
以入爲兵部督團營軍務時中貴人大將多所私役  
廢其廩以空名予營公力欲清之而諸其事者爲首

年爲丙申七破虜明年丁酉十一破虜又明年巳亥  
破虜數如丁酉所上級多至二百餘少亦不下四十  
而 天子所推恩公一加右都御史再加左都御史  
其侍郎俱如故進兵部尚書則御史如故其金幣歲  
至三四賜積金幾數百千巳亥公謀虜吉囊將大入  
萃羣帥而誓之大出賜金爲牛酒饗士陳二寶劔堂  
皇指左劔曰將不用命者徇此指右劔曰卒不用命  
者徇此及期而虜衆果大至挾詐乘我帥醉遂埋登  
馬公前巳聞警率所部夜行八十里抵花馬池卽故  
壘營之賊錯愕不敢犯引而西公召醉帥二詰得其

狀立斬以徇衆皆股栗遂率以躡賊會天大雷雨賊  
弓膠皆解馬蹶蹶泥淖中斃者相屬而公所檄延綏  
周尚文兵擣其左寧夏任傑兵柱其右固靖魏時兵  
擊其鋒公以大兵尾而勁之強弩火礮四合爭奮賊  
遂大敗走梟其名王以下首虜五百級鹵人畜器械  
稱是捷聞 天子行告 廟飲至禮下書褒予公甚  
篤卽軍中策拜太子太保予錦衣正千戶爲世官賜  
金幣踰等尋以公久勞於外改南京戶部尚書亡何  
以入爲兵部督團營軍務時中貴人大將多所私役  
廢其廩以空名予營公力欲清之而諸其事者爲首

鼠兩端以泥公公鬱鬱不得志會報虜將大入公日  
夜治軍不休因以成瘁疾虜去乃露章懇休 上答  
而許之特賜馳驛歸歸二年而卒距其生成化己亥  
六月十六日得年六十有七所娶王夫人後四年卒  
賜祭合葬公亡他媵侍與王夫人相莊白首無間有  
四子所著有問水集關陝奏議安夏錄督府奏疏若  
干卷他詩文亦有存者不佞所志狀略耳竊又從諸  
生守巽所得耿中丞紀而讀之參以舊聞蓋拊卷而  
三歎曰嗚呼公真異人哉當公治邑而稱良墨綬入  
臺而稱良御史治郡佐臬而稱良二千石意以爲精

心勤卹之士耳北治河河功立辦西治屯屯政肅垣  
陝陝之貪墨盡解去大盜散徙始稍露其不可測以  
爲世之得公者尚淺然公南人耳十萬浴鐵之騎霆  
摧電掣於交戟之外而徐以尺一如意揮而糜之百  
步不留堅至其所飛捷明光上下動色謂三秦自洪  
水而後始快意於一勝者終豈能測公哉吾聞之廖  
堂氏之孽公也校卒 聖書一旦以琅璫至豹虎交  
跡卽不道途死且獄死耳公怡然以事付藩臬卽就  
道亡慘容者其定力有以勝死也公目中且無死何  
必有十萬騎哉今夫志大者不能無小出入術勝者

不能無巧進退然而公不爾也當其游太學布袍挾  
一蒼頭僅潦倒諸生而麻城令有世好者業先造公  
請邑事公第以邑所當創革語之不及私也令斂里  
甲貲爲諸舉子費獨謝不受倍遺之亦不受及貴而  
宅憂家居將三載矣靡一紙官府也生平所歷皆撫  
仕而最後以軍興法治全陝人視之泉府矣先人之  
田廬無少增故所薦大帥某緘金幣而爲壽公時已  
得老力却之且報書以爲戒饒人之感知者選斃器  
遺公公怪其精曰得非上方物耶吾書生安用此却  
之不可遂碎之以明非已好也舉進士而中貴人瑾

用事於衆中目屬公異之又問知其同氏以宗人  
投公公不報已啖之美官亦不答其入而督營務也  
距京師三舍許則真人陶仲文以戚屬禮遣刺迂公  
曰與若主胡戚也誤矣亟返之公之歸仲文與有力  
焉嗚呼世安得以出入進退窺公哉公又名能知人  
其識故相太保桂公萼故將太傅周公尚文皆自其  
微時世以比楊文襄云墓在麻城鎖口祖塋不佞旣  
志而銘曰 古之大人識與才合乃立臣極公起墨  
綬以冠惠文至二千石民之愛之若日於冬嬰乳於  
席餉涓屯湟土飽而驕距躍三百捷竹負芻告興三

月河歸其職帝曰虎臣畀汝全陝膺彼愍敵公出匣  
刃斧不用命億衆脇息前茅且指昏蕩天日單于奔  
北梟其屠耆遂殫輶輜王庭磔坼捷奏朝上夕馳璽  
書精鏐綺帛晉爾亞公仍世環衛觀者動色入領元  
樞王旅於寄臣敢愛力惟是不任骸骨爲請帝所關  
識驛馳而南青門冠紳萬口同嘖公之劬勞皆在王  
室靡往不劇迨乎歸田甫遂優遊迺返真宅巍峩佳  
城儼若祁連官所營窳蕭條衡門僅庇雨風手所剪  
棘君使臣禮臣事君忠師訓靡忒我銘其幽才哉誠  
哉過者當式

兵部尚書龍山戴公金行狀

袁 焯

公姓戴氏諱金字純夫號龍山一號三難始祖伏壹  
居徐之百步洪棗林岡宋季避兵徙家於漢陽之龍  
霓山故遂世爲漢陽人四世祖景文舉洪武三年鄉  
試第二人授河南武陽縣教諭以學行著稱沒得祠  
學宮傳二世而生愈愈生伯珍配陳氏寔生公公敏  
慧性成正德丁卯舉於鄉甲戌成進士解褐授蘇州  
府推官會庫亡折糧銀若干兩長吏日考掠守庫者  
竟無驗公乃遍召諸糧役於庭陰以一牌用濃硃塗  
之梟寘後堂暗室中語之曰而輩以糧役役於官乃

茲糧金亡欲避咎弗獲也余有牌在後堂甚神能辨盜盜手摩之則駭然有鳴聲衆如指諸摩出視其手皆殊中一人獨不殊立詰之遂首服還所盜金而守庫者具得釋其訊獄神明奇中若此久之以外艱去服闋再除撫州府推官公理撫視理蘇稱益殷殷起民迄于今謳誦之嘉靖癸未以治最授廣西道監察御史乙酉奉命理兩淮鹽政乃調奏便宜酌處鹽法十二事咸舉要切時可見諸施行公又善操贏縮節費省緡得羨銀六十八萬佐邊餉既大司農上御史績於朝上嘉之有羊酒文綺之賜歲丁亥被

命按川蜀蜀去京師遠與滇隣滇賊安詮者誘其黨構爲亂攻掠郡邑蜀民煽恐事聞廷議興兵誅之公念蜀方旱疫洊臻民殍死者道相望儻軍興給餉是寇未殄而民殲矣乃抗疏乞罷兵躬入險阻撫平之已復疏請帑金二十萬通商市糴具藥給種諸可以瘳民裨賑政者舉無遺策以故全蜀之民得不沾於溝壑者公寔更生之也未幾兵戶二部以公靖寇賑饑功宜獲顯褒乃連章條上公績輒被溫綸雨受銀綺之賜明年戊子屬大比爲監臨官號得人辛卯陞太僕少卿督京營馬政久之以謗左遷河南布政司

右叅議尋轉浙江左叅議將蒞官俄陞按察司副使  
寔董飭海防諦察要害悉心規畫海邦恬以寧戢甲  
午丁繼母艱丁酉釋服再除江西按察司副使兵備  
九江戊戌陞貴州布政司叅政頃之會順天巡撫中  
丞缺乃特擢公爲右僉都御史畀以畿輔重任公受  
命銳意安攘綏民糾慝選將練兵鬪土日奮未踰月  
邊兵與虜遇遂乘勝斬首級奪獲馬器以歸事聞以  
銀綺旌之己亥邊將不利公以撫臣與責改秩南京  
太僕寺少卿庚子陞應天府府尹是年大比士提調  
鄉試井井有程度辛丑 天子將新太廟欲置西南

巨材獨念公長才大器可重任乃擢公爲右副都御  
史總制川貴大木事竣徵入爲大理寺卿已而工部  
以公祗將 明命鳩 清廟美材仰禪 聖孝宜有  
崇秩當其功具疏請於 上上俞之陞右都御史掌  
寺事如舊是歲甲辰 廷試天下士充讀卷官冬十  
月兵部缺尚書廷推公乃陞公兵部尚書公疏辭  
上謂公才猷明練簡任允宜殫宣忠力以弼邦政其  
毋辭公被命感激誓竭忠貞首陳安攘大計十二事  
曰甄別武材以責成效曰稽察分領以警勤惰曰充  
實缺位以備攻守曰選練民兵以裨行陣曰修復陣

車以禦勅敵曰慎養馬匹以利騎戰曰修理關隘以固藩屏曰慎重墩臺以明烽火曰嚴謹盤詰以杜奸細曰優處還宗以收亡叛曰厚養死士以探虜情曰因地選兵以備調度 上省覽嘉閱謂戴尚書賢可屬大事 命公斟酌舉行公膺殊眷受異知乃以身許國毅然爲所欲爲卽涕羣議不暇恤居兵曹數月竟以言者致其事而去大抵公才高意廣銳於有爲視天下難易細大事皆決然可身任之無疑以故厥歷三十餘年內外十四轉致位公卿秩此三事雖勛名政業所在章章可述稱然柄用方隆旋即解組而生平稗蓄不獲悉試智者不能不爲公慨惜也

資善大夫太子少保兵部尚書洪洋趙公廷瑞

墓志銘

趙錦

公諱廷瑞字信臣別號洪洋生而敏悟日記數千言  
摠角入郡庠督學浚川王公見公文大異之登辛巳  
進士改翰林庶吉士壬午授戶科給事中尋養病家  
居既起歷陞刑科都給事中時故相張璠以詹事擢  
兵部左侍郎公上章論璠進士六年遽爾擢貳本兵  
恐後進奔競之徒率以璠借口因論吏部尚書廖紀  
徒負重望不能因事納忠言雖不用聞者憚之武定  
侯郭勛者專恣詭法嘗以私意釋罪人於配所刑部

尚書高友璣侍郎許讚右都御史熊浹大理少卿曾直錦衣衛指揮使路安等不能執法公并論之疏上友璣致仕餘各罰俸有差勛革去祿米及營務保傅提督宣大軍務缺員兵部尚書李承勲薦左都御史王憲憲難之公論憲擇官避事非大臣體憲竟罷去他如論李琮爲江彬爪牙齊佐等爲錢寧羽翼張仁以么麼伶賤潛通逆藩及太監韋霽等奸狀皆見嘉納一時直亮之聲著於中外吏部嘗推公陞河南叅政及南京通政司叅議 上皆不允曰趙廷瑞著在京相應員缺推用其見知如此辛卯歲陞通政司右

通政提督騰黃時父直菴翁迎養京邸屢膺疾思歸公以病請得侍歸抵家而翁遂不起公服闋復除前職丙申陞南京太僕寺卿戊戌改光祿寺卿 駕幸承天公扈從 上言行營倉卒珍膳或不能辦請以土產時物供用公私兩便 上嘉納之 聖駕還宮以建儲事推恩兩京三品以上官皆得廕子入監公以弟廷璋爲父母所隆愛乃上疏以讓其弟己亥用廷薦陞都察院右副都御史巡撫陝西地方公抵鎮首陳考察王府文職官員次陳宗室私出郭大虜駐套請預計軍餉以保障地方時俺答阿不孩率衆渡

河住牧套中公與總督軍務兵部尚書松石劉公議  
定方略大致克捷斬獲首級至一百三十二顆中有  
酋長二疏聞上大悅進公兵部右侍郎兼都察院  
右僉都御史仍巡撫其地先是秦府邵陽王府輔國  
將軍秉樛等縱家奴責債動至拘繫平民公劾論之  
自是宗藩斂跡在鎮二年屢奏虜功辛丑上遣行  
人張汝隆齎賜白金彩幣及勅諭欽獎公以寵遇  
優隆益加策勵秦人稱巡撫關中者馬端肅余敏肅  
之後惟公能不媿云壬寅改戶部右侍郎總督宣大  
山西偏保等處軍情緊急兼程赴雲中所在官民不

擾而兵食足未幾丁母太淑人張氏憂上念年勞  
特予祭葬服闋陞本部左侍郎兼提督太倉尋改兵  
部左侍郎攝部事總督左都御史翁公巡撫山西都  
御史孫公條陳邊事各有異議公維持調護懸合事  
機俱免債事會試天下武舉公爲提調盡革宿弊丁  
未陞南京戶部尚書未抵任卽改兵部尚書會北虜  
結營直抵隆永郊圻震驚公上防護京師內外五事  
爲國家根本之慮虜亦聞風遁去戊申遼陽奏捷斬  
獲虜首甚衆已西北虜大舉入寇官軍鏖戰有功加  
公太子少保賞白金四十兩紵絲三表裏公體孱弱

加以軍務叢雜憂勞過度以致痰火疾作眩暈顛厥  
絕而復蘇乃懇求休致 上謂公託疾求退僅與閑  
住蓋十上望公者厚故責公者重也公還里惟留心  
藥裹端居簡出親戚友朋罕見其面六月二日忽晨  
興命駕造直菴墓所撫視松楸摩挲石獸低徊不忍  
去少頃疾作輿歸遂不起

